



# Vuk'uzenzele



Niyethulelwa wuPhiko lukaHulumeni Lwezokuxhumana kanye Nokuhlinzeka Ngolwazi (GCIS)

isiZulu/English

UMBASA 2015



## Omasipala bazophucula indlela abasebenza ngayo

### More Matshediso

**Kule** zinyanga ezimbalwa ezizayo, ezweni lonkana imiphakathi izothola izidingongqangi ezingcono nje ngoba omasipala besebenza ngokuzikhandla ngenhloso yokuphucula umsebenzi wabo.

UNgqongqoshe Wokwengamela Ngokubambisana Nezendabuko (i-Cogta) u-Pravin Gordhan umemezele ukuthi umnyango wakhe uziqinisa umsebenzi wokuqapha omasipala ukuze kuqinisekise ukuthi bathola ukwesekwa abakudingayo ukuze bakwazi ukuhlinzeka izidingongqangi ngendlela efanele.

“Njengamanje sinomasipala abalinganiselwa kwi-170 abasithumelela imibiko nyangazonke, ephathelene nalokho abakwenzayo ohlelweni lweMazibuyele Emasisweni.

“Kulezi zinyanga ezimbalwa ezizayo, bonke omasipala bethu bazowuthobela umlayelo wokulandela lolu hlelo,” kusho uNgqongqoshe Gordhan.

Wakusho lokhu ngenkathi ekhuluma e-Union Buildings emhlanganweni woMkhandlu Ka-Mongameli Olawula Imisebenzi Eyenziwayo (i-PCC), futhi usihlalo walo mhlango bekungu-Mongameli Jacob Zuma.

Uhlelo lweMazibuyele Emasisweni lwethulwa ngoMandulo ngonyaka odlule ngenhloso yoku-



UNgqongqoshe u-Pravin Gordhan ufuna omasipala baphucule indlela ebasebenza ngayo futhi baqinisekise ukuthi bahlinzeka abantu baseNingizimu Afrika ngezidingongqangi.

vuselela nokufaka umfutho komasipala ukuze kuqinisekise ukuthi bahlinzeka abantu baseNingizimu Afrika ngezidingongqangi.

“Sikwazile ukubonisa inqubekelaphambili esesiyenzile, futhi sazibophezela ukuthi sizokhubeka nokuhlaziya omasipala eNingizimu Afrika...[ukuze sibone] lapho kunezingqinamba ezinkulu khona bese sibhekana nazo,” kusho uNgqongqoshe Gordhan.

Wengeza ngokuthi omasipala kumele baqinisekise ukuthi bayaqhubeka nokuhlinzeka ngezidingongqangi ezinjengamanzi, ukuthuthwa kwendle, izindlu kanye nokuqoqwa kwemfucuzo.

“I-PCC yayamukela indlela ezolandelwa uma kuqhutshekwa phambili futhi yavuma ukuthi uhlelo lweMasibuyele Emasisweni luyithuluzi elisemqoka kakhulu ekuqalisweni koHlelo Lokuthuthukiswa Kwezwe (i-NDP).”

UNgqongqoshe wathi kuzodingeka ukuthi oNgqongqoshe Bezifundazwe basebenze ngokuzikhandla okukhulu kunakuqala ukuxhumana nemiphakathi ekhahlaneyezwe yizinkinga ezithile futhi bathathe izinyathelo zokuthola izixazululo ngokushesha uma kunezinselelo komasipala.

Wengeza ngokuthi oNgqongqoshe Bezifundazwe kumele bathuthukise izindlela ezinohlonze zokuqapha ezifundazweni zabo ukuze kuqinisekise uzinzo nokusebenza ngendlela efanele kohulumeni basekhaya.

UNgqongqoshe u-Gordhan wathi i-Cogta ithumele izincomiso kwiBhodi Yokuklanywa Kwemingcele Yomasipala eziphathelene nokuthi kubuyekwe omasipala abahlulekayo ukuzimela ngokwabo ngakwezizimali.

Wathi futhi ibhodi izoklama izindawo zomasipala zibe yizigceme.

“Esikhathini esiyiminyaka emihlanu, kunabantu abafikayo bezohlala endaweni ethile kanti futhi ngaleso sikhathi abanye bayathutha kuleyo ndawo, ngakhoke isibalo sabantu abahlala endaweni ethile siyaguquguquka, futhi ibhodi kumele ikukhumbule lokhu ngenkathi iklama izigceme.”

### I-NDP, IZINHLELO ZEZIFUNDAZWE KANYE NEZOMASIPALA

UNgqongqoshe wathi i-PCC ithole futhi nombiko ovela eMnyangweni Wezokuqapha Nezokuhlolwa Komsebenzi (i-DPME) ohlaziya izinhlelo zezifundazwe nomasipala eziphathelene ne-NDP.

“Omasipala baneziNhlelo Ezididiyelwe Zentuthuko (ama-IDP) okuzodidiyelwa kuzona izinhlelo zeMazibuyele Emasisweni, futhi lokhu kuzoba yithuluzi lokuqaliswa kwe-NDP komasipala.”

Ama-IDP yizinhlelo zeminyaka emihlanu ezisungulwe ngohulumeni basekhaya ngenhloso yokuthuthukisa inqubo yokuhlala indlela eya phambili kanye nokuhlonza izidingo zokuthuthukiswa kukamasipala.

Wathi uNgqongqoshe Wehhovisi LikaMongameli Wezokuhlala, Ukuqapha Nokuhlola, u-Jeff Radebe, kanye nethimba lakhe bazocubungula izinhlelo zezifundazwe zonkana, nezeminyango kazwelonke neyezifundazwe.

Wathi inqubo yokubuyekisa kaNgqongqoshe Radebe yakhombisa ukuthi omasipala abaningi sebeqale ukusebenza ngendlela elindelekile mayelana nokusekela lokho uhulumeni ahlose ukukufezekisa ngokusebenzisa i-NDP kanye noHlaka Lokusebenza Lwesikhathi Esimaphakathi (i-MTSP).

### IKHWELO LOKUXOSHA KWA-BASEBENZI ABAHLULEKAYO UKWENZA UMSEBENZI WABO

UNgqongqoshe u-Gordhan usekhiphe umyalelo oqondiswe komasipala wokuthi baxoshe bonke abaphathi abakhulu abangenazo iziqu zemfundo efanelekile futhi abahlulekayo ukwenza umsebenzi wabo ngendlela egculisayo.

“Sinxusa izifundazwe ukuthi zibathathele izinyathelo ezifanelekile [abaphathi bomasipala] futhi kuqinisekise ukuthi labo abasezikhulndleni zalolu hlobo bayaxosha kulezo zikhulndla futhi kuqashwe abantu abafanelekile.

“Qashani abantu abafanelekile, niqinisekise ukuthi ninabaphathi abafanelekile emikhakheni efanelekile futhi abanolwazi lomsebenzi kanye nekhono lokuphatha ukuze kube yibona abethweswa umsebenzi wokuphatha leyo mikhakha ebalulekile,” kusho uNgqongqoshe.

“Bonke abantu, kubandakanya noNdunankulu bezifundazwe, bazibophezele ekuqinisekiseni ukuthi uhulumeni uyasabela futhi usukumela phezulu, futhi labo basebenzi bezikhungo zikahulumeni abenza umsebenzi wokwamukela izakhamuzi bakwenza lokho ngokumamatheka nangobungane, futhi bahlinzeke izakhamuzi ngezinsizakalo ngendlela egculisayo nangobugqotho,” kwengeza yena.

### Izikhathi zomsebenzi ezintsha emahhovisi oMnyango Wezasekhaya

Izikhathi zomsebenzi ezintsha ezethulwe nguMnyango Wezasekhaya (i-DHA) zizokwenza ngcono izinsizakalo ezinikezwa umphakathi.

Isikhathi esisha sokuvula kanye nesokuvala, esiqale ukusebenza ngenyanga edlule, siqala ligamenxe ihora lesikhombisa ekuseni kuze kuyogamanxa ihora lesine ntambama, kubandakanya nesikhathi sekhefu esiyimizuzu engama-30. Kodwa-ke isikhathi okuzoqalwa ngaso ukusiza amakhasimende kuzoba yihora lesishiyagalombili ekuseni kuze kuyoshaya ihora lesine ntambama.

Umqondisi-Jikelele woMnyango Wezasekhaya, uMkuseli Apleni, wathi i-DHA yabonisana nezinyunyana zabasebenzi ngaphambi kokuthi kuthathwe isinqumo sokushintsha izikhathi zomsebenzi.

Manje sekunamashifu amabili okusebenza, ishifu yokuqala iqala ligamenxe ihora lesikhombisa iphele ngehora lesine. Ishifu yesibili iqala ngehora lesishiyagalolunye iphele ligamenxe

ihora lesine. Womabili amashifu abandakanya isikhathi sekhefu esiyimizuzu engama-30.

UMnu Apleni wathi isikhathi esisha sokuvula kanye nesokuvala sizohlomulisa amakhasimende omnyango, abaphathi kanye nabasebenzi, futhi sihlomulise nomnyango wonkana.

“Futhi into ebaluleke kakhulu ukuthi isikhathi esisha sokuvula kanye nesokuvala sizonikeze abaphathi kanye nabasebenzi isikhathi esanele sokuxhumana nokubonisa ngezindaba eziphathelene nokuhlinzeka kwezidingongqangi kanye nemisebenzi ehlinzekwa yihhovisi elamukela amakhasimende omnyango,” kusho yena.

UMnu Apleni wathi ngalesi sikhathi esisha sokuvula kanye nesokuvala, abasebenzi basazokhubeka nokusebenza isikhathi esingamahora angama-40 ngeviki, asatshalaliswe ezinsukwini eziyisithupha, ngoMsombuluko kuze kube nguMgqibelo, futhi bazosebenza iMigqibelo emibili kuphela ngenyanga.

Abasebenzi abasebenza ishifu eqala ligamenxe

ihora lesikhombisa ekuseni iphele ngehora lesine basebenza isikhathi esingamahora angama-40 ngeviki kusuka ngoMsombuluko kuze kube nguLwesihlanu. Labo abasebenza ishifu eqala ngehora lesishiyagalombili ekuseni kuze kuyogamanxa ihora lesine ntambama basebenza amahora amahlanu ngoMgqibelo.

Kubasebenzi, ishifu yangoMgqibelo iqala ngehora lesishiyagalombili ekuseni iphele ngehora lokuqala ntambama, kanti amalungu omphakathi wona ahlinzekwa ngosizo kusukela ligamenxe ihora lesishiyagalombili ekuseni kuze kuyogamanxa ihora leshumi nambili ntambama.

UMnu Apleni wathi abasebenzi bayashintshana kula mashifu amabili, ukuze labo abasebenza ishifu yangoMgqibelo balithole nabo ithuba lokuphumula.

**Ukuze uthole ulwazi oluthe xaxa fonela Umnyango Wezasekhaya kule nombolo: 0800 60 11 90.**




## ISABELOMALI SOWEZI-2015

# ISabelomali sowezi-2015: Umzamo onzima wokweneli-sa imikhakha ehlukahlukene



Ungqongqoshe Wezezimali uNhlanhla Nene uhlizeka ngemininingwane yokuthi malini ezosetshenziswa nguhulumeni ukwenza ngcono izimpilo zabantu baseNingizimu Afrika.



Umthombo: Umnyango Wezezimali Kuzwelonke

Amukelani Chauke

**Nakuba** umnotho womhlaba usesimweni esibuthakathaka, futhi naleli libhekene nobunzima kwezezimali, iSabelomali sowezi-2015 sikwazile ukukhombisa ukuzibophezela kukaHulumeni ekwenzeni ngcono izimpilo zabantu abadla imbuya ngothi.

**N**jengamanye amazwe amaningi, kusukela ngowezi-2009, iNingizimu Afrika ikhombise ukukhula komnotho ngesivini sonwabu kanye nokudlondlobala kwesikweletisi esibhekene nohulumeni.

Ngakho-ke isimemezelo seSabelomali sowezi-2015 besiwumzamo ongelula neze kuNgqongqoshe Wezezimali, uNhlanhla Nene, wokwanelisa imikhakha ehlukahlukene.

Izindaba ezimnandi eziphume kwiSabelomali ngezokuthi lesi Sabelomali sizonciphisa umthwalo kulabo abahola umholo omncane kanye nalabo abahola umholo omamaphakathi mayelana nentela edonswa emholweni; futhi kuzokhushulwa imali yempesheni kanye neyezibonelelo zikahulumeni, ezihlinzeka ngo-

sizo olubalulekile kulezo zakhamuzi ezintulayo emiphakathini yethu futhi kuzotshalwa imali ethe xaxa kwezemfundo nakwezempilo.

## UMGUDU OMUSHA WOKUKHULISWA KOMNOTHO

Njengoba kunenkinga yesikweletisi sezwe esikhulayo, iSabelomali sikaNgqongqoshe bekudingeka sibeke leli lizwe emgudwini wokukhulisa komnotho ngokubhekana nezinsalelo ezinciphisa isivini sokukhula komnotho – ezinjengeninga yokushoda kwamandla kagesi – kuvulwe namathuba omsebenzi futhi kwandiswe ukubandakanywa kwabantu kwezomnotho.

UNgqongqoshe wabe azi kahle kamhlophe ukuthi unomsebenzi ongelula neze wokunciphisa izindleko zikahulumeni kule minyaka emibili ezayo, futhi bekumele athole kwintela imali engenayo eyisamba semali engeziwe eyizigidigidi zamarandi eziyi-12 ukuze kuxhaswe isabelomali salo nyaka, aphinde futhi athole esinye isamba esiyizigidigidi zamarandi eziyi-15 sangonyaka ozayo.

Bekudingeka futhi ukuthi anciphise imali eshodayo kwisabelomali ifinyelele ku-3.6%.

Lesi bekuyisabelomali esibaluleke kakhulu kunazo zonke eminyakeni engama-21, futhi nakuba bekunezinsalelo uNgqongqoshe bekudingeka ukuthi aqinisekise ukuthi isabelomali salo nyaka siyahambelana nezinjongo ze-NDP.

“Isabelomali sowezi-2015 kuhloswe ngaso ukuletha uzinzo kwinqubomgomo yezezimali ukuze kufakwe umfutho omkhulu ekukhuthazeni ukutshala kwezimali, kusekelwe ukuthuthukiswa kwamabhizinisi, kukhuthazwe ezolimo kanye nezimboni futhi kwenziwe amadolobha ethu abe yizizinda ezikhuthaza futhi ziqhube ukukhula komnotho,” kusho uNgqongqoshe enkulumweni yakhe.

## IMISEBENZI KANYE NOKUTHUTHUKISWA KWAMABHIZINISI

Uhulumeni uyaqhubeka nokubeka eqhulwini imizamo yokuthola izindlela zokuvula amathuba omsebenzi.

“Lokhu kubandakanya nesaphulelo sentela sokukhuthaza ukuvulwa kwamathuba omsebenzi kanye nokutshala kwezimali, nokusekela ukuthuthukiswa kwamabhizinisi namakhono kanye nezinhlelo zokuvula amathuba omsebenzi,” kusho uNgqongqoshe.

Kulesi sikhathi se-MTEF esiyiminyaka emithathu ezayo imali izokwabiwa ngale ndlela:

- Izigidigidi zamarandi ezingu-10.2 zizokwabelwa izibonelelo zokukhuthaza ukuthuthukiswa komkhakha wokukhiqizwa kwempahla kanye nokuhlinzeka ngosizo lokukhulisa imboni yokuhlinzeka ngezinsizakalo.
- Izigidigidi zamarandi ezingu-5.4 zizokwabelwa uhlelo lokukhuthaza ukuncintisana kwezokukhiqiza ngenhloso yokuxhasa ngezimali izinkampani eziyi-1 450 ukuze zivuselele izinsizakusebenza futhi kuthuthukiswe namakhono.
- Izigidigidi zamarandi ezingu-3.5 zizokwabelwa izizinda zomnotho ezikhethekile zokuthuthukiswa kwengqalasizinda.
- Izigidigidi zamarandi ezingu-3.5 zizokwabelwa uMnyango Wezokuthuthukiswa Kwamabhizinisi Amancane ukuze kufundiswe futhi kuqeqeshwe abanikazi bamabhizinisi amancane.
- Izigidigidi zamarandi ezine zizokwabelwa iSikhwama Sezemisebenzi ngokubambisana nabomkhakha ozimele kwimiklamo ezovula amathuba omsebenzi amasha, kusekelwe abantu abathungatha umsebenzi futhi kususwe nezingqinamba ezivimbela ukukhula komnotho okuhlulisa umuntu wonke.
- Izigidigidi zamarandi ezingu-11.8 zizokwabelwa uMnyango Wezemvelo ukuze kuvulwe amathuba omsebenzi kubantu abazoqashwa ngokugcwele abangaphezu kwezi-107 000 kanye namathuba etoho ayizi-224 000 ngokusebenzisa izinhlelo ze-EPWP kwezemvelo.
- Izigidi zamarandi ezingama-590 zizokwabelwa iSikhwama Sokubhekelela Imvelo kule minyaka emithathu ezayo, futhi le mali izosetshenziswa emiklamweni ebalulekile yezemvelo, ngokubambisana nabomkhakha ozimele.

**\*Funda ikhasi lesi-5 ukuze uthole ulwazi oluthe xaxa Ngenkulumo Yesabelomali.**

## ISabelomali sihlomulisa omasipala

Amukelani Chauke

**UNgqongqoshe** Wesifundazwe saKwaZulu-Natali Wokwengamela Ngokubambisana Nezendabuko, uNomusa Dube-Ncube, usamukele ngezandla ezimhlophe isabelomali esikhulisiwe sengqalasizinda yomasipala, futhi ingxenye enkulu yalesi sabelomali izokwabelwa isifundazwe saKwaZulu-Natali.

**“S**ekuyisikhathi eside sinxusa ukuthi kukhuliswe isabelomali sezidingongqangi komasipala bezindawo zethu, njengoba kusenokusalela emuva okukhona ekwakhiweni kwengqalasizinda, nakuba seyinkulu inqubekelaphambili eseyenziwe,” kusho uNgqongqoshe Dube-Ncube.

Ngenkathi ethula iSabelomali salo nyaka esikhathini esifushane esedlule, uNgqongqoshe Wezezimali uNhlanhla Nene wamemezela ukuthi isabelomali samanzi, ukuthuthwa kwendle kanye nogesi komasipala basezindaweni zasemakhaya sikhushuliwe kakhudlwana impela.

Wathi kule minyaka emithathu ezayo imali eyizigidigidi zamarandi ezingu-4,3 izosetshenziselwa ukwakha ikhono namandla okusebenza futhi kuqiniseke nezinhlelo zokuphathwa kwezimali kanye nokuhlinzeka kwengqalasizinda.

## UKUBUYEKEZWA KWEZIBONELELO ZENGQALASIZINDA

UNgqongqoshe Dube-Ncube wathi futhi imthokozisa kakhulu indaba yokubuyeke-

zwa okuhlelwayo kwezibonelelo zengqalasizinda yomasipala bendawo, okuyinto ezoholela ekuqiniseni kwalo mxhaso wezimali obaluleke kangaka ukuze kulethwe intuthuko kulezo zingxenye zesifundazwe saKwaZulu-Natali ezabe zincishwe amathuba phambilini.

Ukubuyekeza kwezibonelelo zengqalasizinda yomasipala bendawo kuzogxila ekulungisweni kwengqalasizinda.

“Ukulungiswa nokugcinwa kwengqalasizinda yomasipala isesimweni esihle kuyaqhubeka nokuba ngenye yezinto esizibekwe eqhulwini njengoba sinxusa omasipala ukuthi babuyele emuva ekwenzeni izinto ngendlela efanelekile njengengxenye yohlelo lweMazibuyele Emasiseni, esisanda kulwethula esifundazweni sethu,” kusho uNgqongqoshe Dube-Ncube.

## SAMUKELWE NGEZANDLA EZIMHLOPHE ISABELOMALI SEZEMPILLO

Futhi kusenjalo, iNyunyana Yenhlango Yezokwelapha eNingizimu Afrika (i-SAMATU) ikwamukele ngezandla ezimhlophe ukukhushulwa kwesabelomali sezempilo kanye nesezemfundo, futhi le nyunyana yathi yomibili le mikhakha isemqoka kakhulu ekwakhiweni kohlelo lwezempilo olusebenza kahle eNingizimu Afrika.

Umongameli wale nyunyana, uDkt Phophi Ramathuba, wathi uyethemba ukuthi ukukhushulwa kwesabelomali kuzoliphucula kakhulu izinga losizo lwezempilo oluhlinzekwa ezikhungweni zezempilo.

“Abantu emazingeni aphansi basakhononda ngokushoda kwemithi, imishini yokwelapha kanye nabasebenzi bezempilo. Ngakho-ke sinxusa uMnyango Wezempilo noMnyango Wezezimali Kuzwelonke ukuba ithole izixazululo,” kusho uDkt Ramathuba.

I-SAMATU yayamukela ngezandla ezimhlophe futhi nemali eyizigidigidi zamarandi ezingu-1,5 ethathwe ezifundazweni yanikezwa iSikhungo Sikazwelonke Sezifo Ezithathelwanayo, kanye nesibophezelo sokugcina sokukhipha uhlobo loMthetho Odingidwayo ophathelene noMshwalense Kazwelonke Wezempilo.





## ISABELOMALI SOWEZI - 2015

# ISabelomali esizohlomulisa abantu

**Njalo** ngonyaka uhulumeni ushicilela iSibuyekazo Sesabelomali. Lesi sibuyekazo sinikeza isilinganiso sokuthi malini uhulumeni azokwazi ukuyiqoqa ukuze ayisebenzise emikhakheni ebekwe eqhulwini njengezempilo, ezemfundo kanye nezibonelelo zikahulumeni, phakathi kokunye okuningi.

**N**genkathi uhulumeni ehlanganisa isabelomali sezwe, kumele abheke izinto ezimbadlwana, njengomnotho. Umnotho udla indima ebaluleke kakhulu ngoba uma ukhula futhi udlondlobala lokho kusho ukuthi uhulumeni uzokwazi ukuthola imali eningi engenayo.



Ngaphambi kokuthi uhulumeni athathe isinqumo sokugcina mayelana neSabelomali sikazwelonke ulandela inqubo enohlonze enezinyathelo ezilandelayo. Emva kwalokho, uNgqongqoshe Wezezimali wethula iSabelomali ePhalamende futhi lokhu kulandelwa inqubo yokubonisa. ISabelomali sowezi-2015 esethulwa nguNgqongqoshe Wezezimali uNhlanhla Nene sethulwa ngesikhathi lapho leli lizwe libhekene nezinsalelo. Nakuba zikhona izi-

nselelo, uhulumeni usazibophezele ekwenzeni ngcono izimpilo zabantu abadla imbuya ngothi.

### UKUVIKELWA KWEZIBONELELO ZIKAHULUMENI

Kule minyaka emithathu ezayo, uPhiko Lwezimpesheni Nezibonelelo Zikahulumeni (i-SASSA), luzoqhubeka nokwandisa izikhungo zezibonelelo zikahulumeni.

Uhulumeni akakagudluki neze kwisibopho sakhe sokuqeda ukungalingani kanye nobubha. Enye yezindlela zokufezekisa lokhu, ukusekela izakhamuzi ezintulayo ngokuzihlinzeka ngezibonelelo zikahulu-

meni.

Ngowezi-2018, babalelwa kwizigidi ezingu-17.5 abantu baseNingizimu Afrika abazobe bethola ongenani isibonelelo esisodwa kwizibonelelo zikahulumeni. Isibonelelo sikahulumeni yiyona ndlela eqonde ngqo yokulwisana nenselelo yobubha ebhekene nezwe lethu. Ngesibonelelo sikahulumeni, kuhloswe ukuhlomulisa abantu asebhulile ngokweminyaka, izigayigayi zempi, izingane kanye nabantu abanokukhubazeka.

Ukwengeza kanye nokufaka isandla emalini engenayo kula makhaya kunciphisa umthelela wobubha futhi kusenjalo kuphucule isimo sokuzinakekela kwezakhamuzi kanye nemiphakathi njengesinyathelo esibalulekile sokwakhiwa kombuso othuthukayo.

### Imali ekhushuliwe yeZibonelelo Zombuso

<b>Impesheni yabadala</b>	<b>R1 410</b>
<b>Impesheni yabadala, labo abaneminyaka yobudala engaphezu kwama-75</b>	<b>R1 430</b>
<b>Impesheni yezigayayi zempi</b>	<b>R1 430</b>
<b>Isibonelelo sokukhubazeka</b>	<b>R1 410</b>
<b>Isibonelelo sokunakekela ingane engazalwa nguweni</b>	<b>R860</b>
<b>Isibonelelo sezingane ezidinga ukunakekelwa okukhethekile</b>	<b>R1 410</b>
<b>Isibonelelo sezingane</b>	<b>R330</b>

Umthombo: Umnyango Wezezimali Kuzwelonke

## Ezemfundo zigixabezwe ngemali eyengeziwe

### More Matshediso

**U**Mnyango Wezemfundo Eyisisekelo ukwamukele ngezandla ezimhlophe ukukhushulwa kwemali eyabelwe ezemfundo nguNgqongqoshe Wezezimali uNhlanhla Nene kwiSabelomali sowezi-2015.

“Lokhu kukhushulwa kwesabelomali sezemfundo nge-8% ukuze siyofinyelela kwizigidigidi zamarandi ezingama-276.7 kuqinisa ukuzibophezela kwalo hulumeni kwezemfundo njengomkhakha wawo obekwe eqhulwini,” kusho uNgqongqoshe Wezemfundo Eyisisekelo u-Angie Motshekga.

Wathi isabelomali sezemfundo sizolekelela uMnyango Wezemfundo Eyisisekelo emshikashikeni wawo wokufezekisa izinjongo ezibalulwe ohlelweni lwawo lokusebenza, okuwuphucula izinga lohlelo lwezemfundo lonkana kanye nokuqinisekisa ukuthi lusebenza ngendlela egculisayo.

“Lokhu kuzokwenza lukhulu ekuphuculeni ingqalasizinda yezikole, kanye nokuxhunywa kwezikole njengoba siqhubekela emqondweni wegumbi lokufundela lesimanje, nokuqhubeka nokuthuthukisa othisha kanye nokuphucula ukuhlinzekwa kwezinsiza zokusekela abafundi nothisha (i-LTSM), phakathi kokunye okuningi,” kusho uNgqongqoshe Motshekga.

Isabelomali sikaNgqongqoshe Nene sibeke eceleni imali eyizigidigidi zamarandi eziyisikhombisa kule minyaka emithathu ezayo okuzokwakhiwa ngayo ingqalasizinda entsha ezothatha isikhundla sengqalasizinda endala ezikoleni ezingama-510 futhi kuphakelwe amanzi ezikoleni eziyi-1 120, kuhlinzekwe ingqalasizinda yokuthuthwa kwendle ezikoleni ezingama-741 futhi kufakwe ugesi ezikoleni ezingama-916.

“Siyasamukela isimemezelo esenziwe nguNgqongqoshe Nene sokuthi wonke amapulani ezakhiwo zezikole azokwenziwa ngohlelo olufanayo futhi izindleko zokwakha izikole zizolawulwa yihhovisi lesikhulu esiyinhloko yophiko lwezokuthengwa kwempahla nezinsizakalo zikahulumeni,” kusho uNgqongqoshe Motshekga.

UNgqongqoshe wathi kucace bha ukuzibophezela okuqhubekayo kweminyango yonke kahulumeni kwezemfundo, njengoba lokhu kuyiqophelo elisemqoka kakhulu emzamweni wokuletha uguquko kuzo zonke izindawo zomphakathi.

“... Lesi sabelomali senza ukuthi izinjongo



ezichazwe oHlelweni Lokuthuthukiswa Kwezwe zibe yinto engafezekiseka,” kusho uNgqongqoshe.

Ezinye izinyathelo ezizotshenziswa ezikoleni kule minyaka ezayo zibandakanya:

- ukugaywa nokuthunyelwa kwezincwadi zokusebenzela eziyizigidigidi eziyi-170 ezikoleni eziyizi-23 562;
- umfundi ngamunye weBanga R kuya kwiBanga 9 uzothola izincwadi ezimbili esifundweni ngasinye kulezo zifundo ezithathwa njengezibaluleke kakhulu;
- kuzosetshenziswa imali eyizigidigidi zamarandi ezingu-4,1 ukwakha kanye nokusekela imitapo yolwazi yomphakathi; futhi
- kusetshenziswe imali eyizigidigidi zamarandi ezingu-1,1 ukuhlinzeka ngengqalasizinda ye-inthanethi esheshayo ezikhungweni zikahulumeni kanye nasezikoleni.

Futhi uNgqongqoshe uNene wakusekela ukulawulwa esikhungweni esisodwa kohlelo lokuthengwa kwezinsiza zokusekela othisha nabafundi futhi washo nokuthi zonke izincwadi ezizothunyelwa ezikoleni ngonyaka ozayo zizothengwa ngaphansi kwenkontileka okuxoxiswane ngayo nesikhungo esisodwa sikahulumeni, njengomzamo wokuqinisa isandla ekuphathweni kwezimali kanye nokuvimbela inkohlakalo.

### UTHI BEWAZI NJE?

Ukuthi i-inthanethi yohlobo lwe-broadband wuhlobo lwe-inthanethi esebenza ngesivinini esikhulu. Isebenziseka kalula futhi iyashesha kune-modem njengoba ulwazi luthumeleka futhi luqoqeke kwi-inthanethi ngokushesha.

## Uhulumeni uzosebenzisa imali ethe xaxa kwezemfundo nakwezempilo

**K**ule minyaka engama-21 edlule, uhulumeni wenze inqubekelaphambili enkulu ekuqinisekiseni ukuthi abantu baseNingizimu Afrika bathola imfundo eseqophelweni eliphezulu futhi bahlinzekwa ngosizo lwezempilo olusezingeni eligculisayo. Kule minyaka emithathu ezayo, isabelomali sizokwabiwa kanje:

- **Imali eyizigidigidi zamarandi ezingu-19.5** izokwabelwa uMnyango Wezempilo ukuze kulungiswe futhi kuvuselelwe izikhungo zezempilo kanye neminye imiklamo emikhulukazi eyisikhombisa eqhutshwa yiminyango yezifundazwe nekazwelonke.



- **Izigidigidi zamarandi eziyisikhombisa** zabelwe isibonelelo esinemibandela sokuqeda ukusalela emuva komsebenzi wokwakhiwa kwengqalasizinda yezikole ngokuthi kwakhiwe ingqalasizinda entsha ezothatha isikhundla sengqalasizinda endala ezikoleni ezingama-510 futhi kuphakelwe amanzi ezikoleni eziyi-1 120, kuhlinzekwe ingqalasizinda yokuthuthwa kwendle ezikoleni ezingama-741 futhi kufakwe ugesi ezikoleni ezingama-916.



- **Izigidigidi zamarandi ezingu-3,1** zizokwabelwa uhlelo lomfundaze we-Funza Lushaka. Kucatshangelwa ukuthi ngowezi-2017/18 bayizi-10 200 othisha abasha abazongena emkhakheni wezemisebenzi kahulumeni. UHlelo Lomfundaze weFunza Lushaka wuhlelo lweminyaka eminingi olugququzela ukufundisa ezikoleni zikahulumeni.







## IZINKULUMO EZICHAZA IZIMO ZEZIFUNDAZWE

**O**Ndunankulu bezifundazwe zakuleli eziyisishiyagalolunye kanye nohulumeni bezifundazwe zabo banezinhlelo ezinkulukazi zokwenza ngcono izimpilo zabantu abahlala lapho. Imininingwane efinqinisekile yalezi zinhlelo yahlizelwa esikhathini esifushane esidlule ngenkathi oNdunankulu bethula iziNkulumo zabo Ezichaza Izimo Zezifundazwe zabo.

### ILimpopo iheha abatshali-zimali bamazwe ngamazwe



UNdunankulu u-Stanley Mathabatha



#### Nthambeleni Gabara

Isifundazwe saseLimpopo sesiyisifundazwe esingaconsi phansi kubatshali-zimali bamazwe ngamazwe, kusho uNdunankulu waseLimpopo u-Stanley Mathabatha.

“Ohambweni lwethu lwase-China ngoMfumfu ngowezi-2014 lokuyonxenxa ukuhwebelana nokutshalwa kwezimali, sasayinda izivumelwano zokusebenzisana nabatshali-zimali abakhulu.

“Isivumelwano sokusebenzisana sokuqala sasayindwa nenkampani yezezimayini i-Hong Kong Mining Exchange Company (Hoi Mor) mayelana nokusungulwa komklamo obizwa nge-South Africa Energy Meturlligical Base Project,” kusho yena eNkulumweni yakhe Echaza Isimo Sesifundazwe (i-SOPA). Lo mklamo, ozongenisa utshalomali olulinganiselwa kwizigidigidi zamarandi ezingu-38.8, uzokwakhiwa kwiSizinda Sezomnotho Esikhethekile saseMusina, futhi

uzovula amathuba omsebenzi ayizi-19 000 esikhathini esiyiminyaka emithathu.

Inhlango yabesifazane yaseNingizimu Afrika i-Women Investment Holdings nayo seyisayinde isivumelwano sokubambisana nenkampani i-Jidong Development Group kanye NesiKhwama sase-China Sokuthuthukiswa kwe-Afrika emklamweni wokwakha usemende eThabazimbi okuzotshalwa kuwona imali eyizigidigidi zamarandi ezingu-1.65.

Umsebenzi wokwakha, owaqala ngowezi-2014, bekulindlele ukuthi uphuthulwe ngenyanga edlule.

“Angingabazi nakancane ukuthi lolu tshalomali luzoba negalelo elibonakalayo emizamweni yethu yokwandisa amandla okukhiqiza omnotho wethu,” kusho uNdunankulu Mathabatha.

### UKUTSHALWA KWEZIMALI KWEZOLIMO

“Ekuqaleni kwalo nyaka savula amakolishi ezolimo i-Madzivhandila kanye ne-Tompi Seleka.

“Njengamanje lama kolishi asebenza ngokuphelele. Anabafundi ababalelwa kwi-140,” kusho yena.


UNdunankulu uMathabatha wathi ingqikithi yohlelo lwezifundo ihlelwe kabusha futhi yenziwa ngendlela ezokwenza ukuthi kukhiqizwe osomnotho bezolimo, abalimisi, ososayensi bezamadlelo nomhlabathi, ososayensi bezokuphatha komhlaba nokukhiqizwa kwezitshalo kanye nochwepheshe bezokulinywa kwezitshalo.

Futhi uhlelo lwezifundo ludidiyelwe neminye imikhakha yezifundo ehlinzekwa yiNyuvesi yaseLimpopo kanye neNyuvesi yaseVenda.

### Ukunqandwa kwezigameko zokushona komama ngenkathi bebeletha kubekwe eqhulwini e-KZN



UNdunankulu uSenzo Mchunu



#### Pricilla Khumalo

**K**ule minyaka emihlanu ezayo, uHulumeni WeSifundazwe sakwaKwaZulu-Natali uzogxila ekuncishiseni kwezigameko zokushona komama ngenkathi bebeletha kanye nokushona kwabantwana ngenkathi bezalwa.

Ngenkathi ethula iNkulumo Echaza Isimo Sesifundazwe (i-SOPA), uNdunankulu uSenzo Mchunu wathi nakuba busabhokile ububha, isifundazwe sikwazile ukwehlisa isibalo sezingane ezineminyaka engaphansi kwemihlanu, ezinesisindo esingaphansi kwesamukelekile, njengoba sehlile sisuka kwizingane ezingama-44 ezinganeni eziyi-1 000 ngowezi-2010 safinyelela lapho sime khona njengamanje, okuyizingane ezingaphansi kweziyi-14 ezinganeni eziyi-1 000.

Isifundazwe sikwazile futhi ukwehlisa izinga lokushona kwezingane ezingaphansi konyaka ubudala lisuka ku-10.8% ngowezi-2010 lafinyelela lapho lime khona njengamanje ku-7.3%.

“Isilinganiselo sokuhlukaniswa komama abashonela ezikhungweni zezempilo ngenkathi bebeletha sime komama abayi-138 esibalweni somama ababelethayo abayi-1 000, futhi lesi sibalo sehlile sisuka komama obashonile abayi-195 kwi-1 000 ngowezi-2010. Iminyaka yokuphila yabesilisa ikhuphukile yafinyelela kuma-54 isuka kuma-49, kanti futhi iminyaka yokuphila yabesifazane ikhuphukile yafinyelela kuma-59 isuka kuma 50,” kusho uNdunankulu uMchunu.

Isifundazwe sizosheshisa uhlelo lokunqanda ukudlulisekela kwegciwane lesandulelangculazi kumntwana lisuka kumama futhi sizosheshisa ukuqaliswa koMkhankaso Wokusheshisa Kokuncishiswa Kwezigameko Zokushona Komama kanye Nabantwana e-Afrika.

Isifundazwe sizosheshisa futhi nokuqaliswa komkhakhanso obizwa ngePhila Mntwana emazingeni omphakathi ukuze kukhuliswe izinga lokwelashwa kwezingane ezineminyaka yobudala engaphansi kwemihlanu futhi kukhuliswe nezinga lokuhlalelwa isifo sofuba kanye nokwelashwa kwezingane ezikulesi sigaba seminyaka yobudala.

“Sihlose ukunciphisa isibalo sezigameko ezintsha zokusuleleka ngesandulelangculazi ngama-50% ngowezi-2016 futhi sinciphise umthelela wesandulelangculazi nengculazi ngokuthi sikhuphule isibalo sabantu abahlo-mulayo kwiphakheji efanelekile yosizo lokwelashwa nokusekelwa, ukuze sifinyelele kubantu abangama-80% wabantu abanesandulelangculazi,” kusho uNdunankulu uMchunu.

### Isifundazwe sase-NW sizolwisana nezinselelo zokushoda kwamanzi



UNdunankulu u-Supra Mahumapelo



#### Neo Semono

**U**hulumeni Wesifundazwe saseNyakatho Ntshonalanga (i-NW) usubeke eceleni imali engaphezu kwezigidigidi zamarandi eziyi-100 ukwenza ngcono ingqalasizinda kule minyaka emithathu ezayo.

Ngenkathi ethula iNkulumo yakhe Echaza Isimo Sesifundazwe, uNdunankulu u-Supra Mahumapelo wathi iSabelomali Sengqalasizinda sibandakanya yonke iminyango yesifundazwe kanye nabo bonke omasipala abangama-23.

“Lesi sabelomali sizosetshenziselwa ukwakha imigwaqo, ukuhlinzeka ngamanzi nengqalasizinda yokuthuthwa kwendle, izikole, ingqalasizinda yezempilo, izindlu, ezolimo, kanye nengqalasizinda yezobuciko nokuvakasha, kuzo zonke izigceme ezingama-383 esifundazweni,”

### Ukuvuselela nokufaka umfutho emnothweni wase-malokishini aseGauteng

#### Bathandwa Mbola



**U**Hulumeni Wesifundazwe saseGauteng ubeke eceleni imali engaphezu kwezigidi zamarandi eziyi-160 ngenhloso yokuphucula kanye nokukhuthaza amandla okukhula nokudlondobala komnotho waselokishini.

UNdunankulu u-David Makhura wenza lesi simemezelo ngenkathi ethula iNkulumo yakhe Echaza Isimo Sesifundazwe (SOPA), futhi washo nokuthi le mali izohamba igxathu elikhulu emzamweni wokulwisana nokuntuleka kwamathuba omsebenzi, nobubha kanye nokungalingani.

“Kumele sisebenzele ukuletha izimo lapho lelo nalelo randi elivela emnothweni waselokishini libuyiselwa kuwona umnotho waselokishini futhi lihlomulise abahlali baselokishini,” kusho uNdunankulu Makhura.

Ngaphezu kwalokho, omasipala abakhulu abathathu (OwaseGoli, Tshwane kanye nowase-Ekurhuleni) babeke eceleni imali eyizigidigidi zamarandi ezintathu, izigidi zamarandi ezingama-22 kanye nezigidi zamarandi eziyi-150, ngokulandelana kwabo, ukusekela umnotho wasemalokishini kanye nosomabhizinisi basemalokishini kule minyaka emihlanu ezayo.

E-Diepsloot, uNgqongqoshe Wesifundazwe u-Lebogang Maile wamemezela ukuthi osomabhizinisi basemalokishini abalinganiselwa kwi-160 abenza umsebenzi wokukhiqiza izimpahla ezincane kanye neminye imisebenzi yokukhiqizwa kwempahla bazohlomula kutshalomali lwezigidigidi zamarandi ezingu-1.6 kwiSizinda sase-Riversands/Diepsloot Sokusekelwa Nokuxhaswa Kwamabhizinisi Asafufusa.

Kuzosungulwa izizinda ezintsha eziyisikhombisa emalokishini ahluahlukene esifundazweni. Lezi zizinda zizolekelela futhi zisekele amabhizinisi asemalokishini.

Izizinda zasemalokishini ezintsha zizosungulwa e-Ennerdale, Hammanskraal, Mabopane kanye nase-Reiger Park.

Ngaphezu kwalokho, kuzovuselelwa amapaki ezimboni aseKathehong, Orlando, Residentia, Khutsong kanye nase-Ennerdale, kusho uNgqongqoshe Wesifundazwe uMaile.

Kula makota amathathu edlule, uhulumeni wesifundazwe futhi usenze amagxathu amakhulu ekuvulweni kwamathuba omsebenzi.

Seluqalile ukwenza umehluko ezimpi-lweni zetsha uhlelo lwe-Tshepo 500 000, olwethulwa

ngoZibandela 2014, kusasele izinyanga ezintathu ngaphambi kwesikhathi esabe sibekiwe, okuwuhlelo lukaHulumeni Wesifundazwe saseGauteng okuhlolswe ngalo ukuletha ithemba kanye nokugeqesha abantu abasha baseGauteng abayizi-500 000 emakhonweni ahluahlukene, kubandakanya namakhono ebhizinisi.

Ekupheleni kwekota yesithathu bese kuvulwe amathuba etoho ayizi-165 516 ngokusebenzisa uPhiko Lukazwelonke Lwezemisebenzi Yentsha, uhlelo lwe-Zivuse-ni, izikhungo ezixhaswa ngezimali wuMnyango Wokwengamela Ngokubambisana kanye Nezendabuko kanye nalabo ababambisene nabo njenge-Independent Development Trust kanye nezinye izinhlangano ezingekho ngaphansi kukahulumeni.

Isifundazwe sesenze inqubekelaphambili ebonakalayo emiklamweni eqaliswe ngokohlelo lukahulumeni lwengqalasizinda yemisebenzi emikhulukazi.

Kule minyaka emihlanu ezayo, isamba esiphelele semali ezotshalwa nguHulumeni Wesifundazwe saseGauteng emiklamweni yokuthuthukiswa kwengqalasizinda sizoba ngaphezu kwezigidigidi zamarandi ezingama-32, kanti futhi esikhathini esifanayo omasipala baseGauteng bazochitha imali eyizigidigidi zamarandi ezingama-94.

Kule minyaka emihlanu ezayo, amabhizinisi asemalokishini azohlizelwa futhi ngamathuba athe xaxa okwenza ibhizinisi nohulumeni.

“Manje sesizibophezele ukuthi sizobeka eceleni ama-30% esabelomali sokuthenga izimpahla nezinsizakalo zikahulumeni ngenhloso yokuthenga lokhu kosomabhizinisi basemalokishini kule minyaka emihlanu ezayo,” kusho uNdunankulu uMakhura.

### Ukuvulwa kwamathuba omsebenzi kubekwe eqhulwini eMpumalanga

#### Edwin Tshivhidzo



**U**Ndunankulu wesifundazwe saseMpumalanga Kapa uPhumulo Masualle uthi ngowezi-2015 isifundazwe sizogxila ekuvulweni kwamathuba omsebenzi kanye nezindlela zokuziphilisa ezisimeme.

Isifundazwe sihlolile ukuvula amathuba etoho ayizi-129 597 ngoHlelo Olunwetshiwe Lwemisebenzi Kahulumeni (i-EPWP) futhi kuvulwe amatoho ayizi-37 000 ngoHlelo Lwemisebenzi Yomphakathi (i-CWP).

“Lokhu kumele sikwenze ngaphansi kwesimo sezomnotho esikhombisa umnotho onezinga lokuntuleka kwamathuba omsebenzi elingelinye lalawo aphakeme kakhulu ezweni. Sizama konke okusemandleni ethu ukufezekisa umsebenzi wokuhlinzeka abantu bethu ngamathuba omsebenzi asimeme,” kusho yena ngenkathi ethula iNkulumo Echaza Isimo Sesifundazwe.

Izinga lokuntuleka kwamathuba omsebenzi njengamanje esifundazweni lime kuma-30.8%, kanti futhi izinga lokuntuleka kwamathuba omsebenzi entsheni lime kuma-50%.

UNdunankulu uMasualle wathi kuvulwe amathuba omsebenzi ayizi-24 737 emkhawulweni obubekiwe wokuvula amathuba omsebenzi ayizi-13 234 ngokusebenzisa izikhungo ezinjengeNhlango Yokuthuthukiswa Kwesifundazwe saseMpumalanga Kapa (i-ECDC), iSizinda Sokuthuthukiswa Kwezimboni saseMonti (i-ELIDZ) kanye neNhlango Yentuthuko yase-Coega (i-CDC).

Isifundazwe sibheke imiklamo yotshalomali eyi-14 yenani eliyizigidigidi zamarandi eziyizi-2 237 kulama-IDZ amabili.

“Njengengxenywe yokukhangisa isifundazwe njengesifundazwe esiqokwa ngabatshalizimali, sithuthukisa uHlelo Lokugqagqezela Uku-tshalwa Kwezimali okuhloswe ngalo ukwakha isimo esikahle futhi esivumela ukukhuliswa komnotho okunohlonze esifundazweni,” kusho uNdunankulu.

Ngonyaka wezimali wezi-2015/16, i-ECDC kulindlele ukuthi ivule amathuba omsebenzi ayizi-7 000, kanti i-Coega yona izovula amathuba ayizi-8 797 bese kuthi i-ELIDZ ivule amathuba ayizi-5 500.

UNdunankulu uMasualle wathi kulo nyaka





## IZINKULUMO EZICHAZA IZIMO ZEZIFUNDAZWE

kuzovulwa amathuba omsebenzi kwezokukhiqiza, ukuthuthwa kwempahla, imiklamo ehlukile yokuphehla ugesi, ukulungiswa kwemikhiqizo yezolimo kanye nezinsizakalo. “Njengomzamo othe xaxa wokwenza ngcono ukuvulwa kwamathuba omsebenzi, sizosekela amabhizinisi asafufusa angama-280 kanye nemifelandawonye engama-70,” kusho yena.

Lokhu kuzoqinisekisa ukubamba iqhaza ngenkuthalo emnothweni kwemikhakha eyabe incishwe amathuba phambilini.

Isifundazwe sesivule amathuba etoho ayizi-35 222 ngohlelo lwe-CWP futhi savula amathuba ayizi-155 235 ngohlelo lwe-EPWP, okukhombisayo ukuthi isifundazwe sizuze

umphumela ongaphezu komkhawulo ebesizibekela wona.

Cishe angama-64% amathuba etoho avulwe ngaphansi kwe-EPWP, ahlomulise abesifazane, kanti angama-39% ahlomulise intsha bese kuthi i-1% ihlomulise abantu abanokukhubazeka. Bayizi-4 184 abantu abasha abaqeqeshiwe ngaphansi kohlelo olusheshayo lokuthuthukiswa kwamakhono kanye nolwazi olubizwa nge-*Accelerated Professional and Trade Competency Development Programme* kanye noHlelo Lukazwelonke Lokubhekelela Intsha Yasezindaweni Zasemakhaya, emkhawulweni obubekiwe wokuqeqesha abantu abasha abayizi-3 678.

## Isifundazwe saseFreyistata sithola ukuxhaswa kwezengqalasizinda yezikole

Albert Pule

**U**Hulumeni Wesifundazwe sase-Freyistata uzogxila ekuphuculweni kwemiklamo yengqalasizinda ehluahlukene esifundazweni sonkana.

Kuze kube manje, uhulumeni wesifundazwe usuphothule umsebenzi wokwakhiwa kwezikole ezintathu kanye namahostela ezikole ezintathu ezingxenyeni ezahlukahlu-kene zesifundazwe.

“Imiklamo yengqalasizinda ephothulwe ngalo nyaka wezimali ibandakanya izikole ezintathu ezintsha, okuyisikole samabanga aphantsi i-Letlotlo Naledi Primary e-Bothaville, i-Nthutuzelo Primary e-Bultfontein kanye ne-Lister Skosana Primary e-Parys.

“Sekuphothulwe amahostela ezikole amathathu amasha e-Phillipolis, Bainsvlei kanye nase-Ventersburg. Ukuthuthukiswa kwamahostela kuwuphawu lokuqhubekela phambili nokuzibophezela kwethu eku-nciphiseni kancane kancane ukuthembela kwethu kwizithuthi ezithutha abafundi, ukuze kuqinisekiswa ukuthi abafundi bathola imfundo eseqophelweni eliphezulu,” kusho uNdunankulu uMagashule.

Kunezinye izikole ezimbili ezakhiwe ngaphansi koHlelo Lokusheshiswa Komsebenzi Wokwakhiwa Kwengqalasizinda Yezikole (i-ASIDI).

I-ASIDI wuhlelo loMnyango Wezemfundo Eyisisekelo lokuqeda ukusalela emuva komsebenzi wokwakhiwa kwengqalasizinda yezikole. Futhi ngalolu hlelo kuhloswe ukuphucula izinga lezikole ukuze lilingane nezinga lokusebenza kwezikole ngendlela encomekayo elibekwe ngokweMigomo

Namazinga Engqalasizinda Yezikole futhi kuhloswe ukuqinisekisa ukuthi izikole ziphephile futhi zinengqalasizinda efanelekile.

“Sesiwuphothulile futhi nomsebenzi wokwakhiwa kwezikole ezimbili ngaphansi kohlelo lwe-ASIDI – okuyizikole obekumele zakhiwe ngendlela efanelekile ngoba phela bezakhiwe ngempahla yokwakha yesikhashana.”

Lezi zikole yi-PT Sanders e-Trompsburg kanye nesikole samabanga aphantsi i-Vredefort Primary esise-Vredefort.

Eminye imiklamo yengqalasizinda ibandakanya lokhu okulandelayo:

- Izikole ezintsha kwizifunda ezahlu-kahlukene esifundazweni.
- Kuneminye imiklamo eqhubekayo ezikoleni ezingama-66 esifundazweni saseFreyistata. Le miklamo izokwengeza amakilasi ezikoleni ezingama-31, izakhiwo zamahhovisi abaphathi nothisha ezingama-29, amahholo amasha ayi-12, amagumbi okuphekela amasha ayi-12 kanye nezizinda zolwazi nama-labholetiri ayi-12.
- Umsebenzi wokwakha uyaqhubeka kwezinye izikole ezingama-20 ngaphansi kohlelo lwe-ASIDI.
- Kuzophuculwa izikole eziyi-10 ukuze zibe yizikole ezinezinsizakalo zokufundisa eziphelele njengomzamo wokubhekelela abafundi abanokukhubazeka.
- Kunamahostela ezikole amane akhiwayo. (Esikoleni samabanga aphakeme iSediti Secondary kanye nesikole sabakhubazekile i-Boitumelong Special School – zombili ezisendaweni yaseThaba Nchu – nesikole esihlanganisa amabanga aphantsi naphakeme i-Edenville Combined School esise-Edenville kanye nesikole sasepulangini i-Sebonakaliso Farm School e-Harri-smith.)
- Kuzokwakhiwa futhi namakilasi amasha angeziwe angama-50 eBanga R.

## Ukuguqulwa kwe-Nyakatho Kapa

Ursula Graaff

**I**nkulumo Echaza Isimo Sesifundazwe kaNdunankulu waseNyakatho Kapa ayethule esikhathini esifushane esedlule beyigxile ekuguqulweni komnotho wesifundazwe kanye nasezinhlelweni zokuhlinzeka ngogesi ovuselelekayo.

Babalelwa kwizi-18 000 abantu abaqashiwe esifundazweni ekupheleni kowezi-2014, ikakhulu emkhakheni wezolimo kanye nowezokwakha.

### IZINHLELO ZOKUHLINZEKA NGOGESI OVUSELELEKAYO

UNdunankulu u-Lucas wathi inkampani yakwa-Eskom seyixhume kwisikhungo sika-gesi sikazwelonke ugesi ovuselelekayo ongamamegawathi angama-950 ovela kubaKhiqizi Bagesi Abazimele.

Abakwa-Eskom basebenzise imali engaphezu kwezigidi zamarandi ezingama-300 emiklamweni emikhulukazi yokuphucula izikhungo zokuphehla ugesi eNyakatho Kapa, okuyimiklamo ebandakanya ukwakhiwa kweSiteshi esisha Sokuphehla Ugesi sase-Schmidsdrift kanye neSiteshi Sokuphehla Ugesi sase-Canal eduze kwase-Vanderkloof.

UNdunankulu wathi uzophothulwa ngesigamu sokuqala sowezi-2015 umklamo wokufakelwa kwezintambo zikagesi ezithumela umthamo ophakeme kakhulu wamandla kagesi, okuyinto esemqoka kakhulu embonini yokumbiwa kwemanganizi endaweni yase-Hotazel.

Intambo kagesi entsha ethwala amakhilovolthi angama-400 izophakela ugesi endaweni yase-Kathu/Hotazel.

Phakathi kukaMbasa noZibandlela wezi-2014, kuxhunye ugesi emakhaya ayizi-2 000 futhi kulindeleke ukuthi kuxhunye amanye amakhaya ayi-1 058 ngaphambi kwenyanga kaNdasa 2015.

Imiklamo yokuthuthukiswa kwengqalasizinda esifundazweni kule minyaka emitha-

thu ezayo ibandakanya:

- Izigidi zamarandi eziyi-170 zizosetshenziswa emiklamweni yokufakwa kabusha kwetiyela emgwaqeni, futhi lokhu kubandakanya umgwaqo oxhumanisa i-Loeriesfontein ne-Nieuwoudtville; umgwaqo oxhumanisa i-Philipstown ne-Hanover kanye nomgwaqo u-MR795 e-Strydenburg.
- Izigidi zamarandi ezingama-93 zizosetshenziselwa ukulungisa umonakalo obangelwe yizikhukhula ezindaweni ezahlukahlu-kene kubandakanya nendawo yase-Petrusville, Prieska North, Neile-rsdrift, Kakamas kanye ne-Blouputs.
- Izigidi zamarandi ezingama-25 zizosetshenziselwa ukulungisa amabhuloho kwiSifunda sase-Namaqua.
- Izigidi zamarandi eziyisishiyagalombili zizosetshenziselwa ukulungisa izigodi emgwaqeni.
- Izigidi zamarandi ezingama-20 zizosetshenziselwa ukufaka izimpawu nemigoqo yezinsimbi emgwaqeni.
- Izigidi zamarandi ezingama-205 zizosetshenziselwa imiklamo yokulungiswa kwemigwaqo kanye nokuvimbela umonakalo emigwaqeni yesifundazwe sonkana.
- Izigidi zamarandi eziyi-100 zizosetshenziselwa ukulungisa umgwaqo u-N14 e-Postmasburg oyibanga elingamakhilomitha angama-55. Kulo mklamo kuvuleke amathuba etoho angama-50. Kuze kube manje, sekuphothulwe ingxenyengama-90% yalo mklamo.
- Izigidi zamarandi ezingama-60 zizosetshenziselwa ukulungisa umgwaqo oxhumanisa i-Hotazel ne-Tsineng, ngokubambisana nenkampani yezimbiwa i-BHP Billiton. Isigaba sesithathu sizoqala khona maduze nje.
- Izigidi zamarandi ezingama-240 zizosetshenziselwa ukulungiswa komgwaqo oxhumanisa i-Hondeklip Bay nomgwaqo u-N7 eduzwe kwase-Garies. Isigaba sokuqala salo mklamo saqala ngoLwezi 2013 futhi iSigaba sesibili sizoqala ngo-nyaka wezimali wezi-2015/16.

izintambo noma amakhebuli katelethoni.

Ngenkathi ethula iNkulumo Echaza Isimo Sesifundazwe, uNdunankulu u-Helen Zille wamemezela ukuthi izikhungo zikahulumeni ezibalelwa cishe kwizi-2 000 zizohlizenzeka ngezinsizakalo ze-inthanethi esheshayo, okuyinto ezohlomulisa abantu besifundazwe.

“Ngakho-ke, kuyintokozo enkulu kimina ukuthi ngimemezele ukuthi uHulumeni waseNtshonalanga Kapa, uPhiko Lwezobuchwepheshe Bolwazi Lombuso (i-SITA) kanye ne-Neotel namuhla ekuseni basayinde isivumelwano esibalulekile sokuhlinzeka izinsizakalo ze-inthanethi esheshayo ezikhungweni zikahulumeni ezibalelwa kwizi-2 000, kubandakanya izikole, imitapo yolwazi kanye nezikhungo zezempilo kule minyaka emibili kuya kwemithathu ezayo.”

NgoNhlabo ngonyaka ozayo, zonke izikhungo zikahulumeni zizobe sezixhunye i-inthanethi enesivivini okungenani esingama-10Mbps ngaphansi kwalesi sivumelwano futhi ngoNcwaba wezi-2018, izikhungo eziningi zizobe sezixhunye ngamakhebuli efayibha, futhi izikhungo ezingama-90% kulezi zizobe sezine-inthanethi enesivivini esingama-100Mbps kanti futhi eziyi-10% zizobe zinesivivini esingama-1Gbps.

Ngokusho kukaNdunankulu, izinsizakalo ze-inthanethi esheshayo ezenziwe ngcono zizolekelela uhulumeni ukuthi akwazi ukuvulela abantu besifundazwe amathuba.

## Isifundazwe sase-Ntshonalanga Kapa sithola ukuxhaswa kwezobuchwepheshe

Albert Pule

**I**zikole, imitapo yolwazi kanye nezikhungo zezempilo esifundazweni saseNtshonalanga Kapa sonkana zithole ukuxhaswa okukhulu kwezobuchwepheshe, njengoba zihlinzekwe ngezinsizakalo zesimanjemanje ze-inthanethi esheshayo.

Lokhu kwenzeke ngenxa yobambiswano phakathi kukahulumeni waseNtshonalanga Kapa, uPhiko Lwezobuchwepheshe Bolwazi Lombuso (i-SITA) kanye nenkampani eyisikhondlakhondla kwezokuxhumana ngezingingo i-Neotel.

Lokhu kubambisana kuzoholela ekusungulweni kwezikhungo ze-WiFi ezingaphezu kwama-300 ezizosungulwa engxenyeni enkulu yesifundazwe. Ukuxhumana nge-inthanethi okungenantambo – futhi okubizwa nge-WiFi – kuyindlela yokuthola i-inthanethi esheshayo ngaphandle kokusebenzisa izintambo. Loluhlelo lwenza ukwazi ukuxhuma amakhompyutha noma ukuphi ngaphandle kokuxhuma

## Isifundazwe sase-Mpumalanga sizogxila ekuthuthukisweni kwengqalasizinda

Nosihle Shelembe no-Ursula Graaff

**I**sifundazwe saseMpumalanga sesibekaceleli imali eyizigidigidi zamarandi ezingu-2.065 ezosetshenziswa ohlelweni lokuthuthukiswa kwengqalasizinda ngowezi-2015/16.

“Uhlelo lwethu lokuthuthukiswa kwengqalasizinda luyaqhubeka nokubeka eqhulwini ingqalasisinda yezehlalo nezomnotho enjengemigwaqo, izibhedlela kanye nezikole,” kusho uNdunankulu u-David Mabuza ngenkathi ethula iNkulumo Echaza Isimo Sesifundazwe (i-SOPA).

Njengengxenyekokuthuthukiswa kwengqalasizinda esifundazweni, iMbombela seyiphothule iSigaba Sokuqala sokuqaliswa kweNethiwekhi Edidiyelwe Yokuthuthwa Komphakathi.

Uyaqhubeka umsebenzi wokwakhiwa kwengqalasizinda, obandakanya ukwelulwa kwezixenyekwezithile zemigwaqoeziNgxenyeni Ezimaphakathi Kwedolobha. Ngalo mklamo kuhloswe ukudidiyela zonke izinhlobo zekuthutha.

UNdunankulu uMabuza wathi selwamukeliwe futhi nohlelo lokuthuthukiswa komzila wesitimela i-Moloto Rail Corridor.

“I-Moloto Development Corridor izobangumklamo ozokhuthaza ukukhula komnotho kanye nokuvulwa kwamathuba omsebenzi okuyinto ezohlomulisa isifundazwe, ikakhulu oMasipala Bendawo, iThembelesile Hani kanye Dr JS Moroka.

“Lo mklamo uzoheha abatshali-zimali abavela emkhakheni ozimele ezindaweni ezakhelene nalo mzila, futhi lokho kuzokhuphula amathuba okuthi abantu bazitholele amatoho futhi kuthuthukise namabhizinisi endawo,” kusho yena.

### IMAKETHE YASEMPUMALANGA ETHENGISA IMIKHIQIZO YEZOLIMO EMAZWENI ANGAPHANDLE

UNdunankulu uMabuza wathi seyiphothuliwe inqubo yokuthola kanye nokubhalisa umhlaba okuzokwakhiwa kuwona iMakethe YaseMpumalanga Ethengisa Imikhiqizo Yezolimo Emazweni Angaphandle.

“Seyiphothuliwe yonke imidanti okumele ilandelwe ngenhloso yokuthobela umthetho, njengokuhlolwa komthelela wokukhahlamezeka kwemvelo.”

IMakethe YaseMpumalanga Ethengisa Imikhiqizo Yezolimo Emazweni Angaphandle izokwakha ingqalasizinda edingekayo kanye nethuba lezokuthuthwa kwempahla elizolekelela abalimi bemifino, izithelo, amawolintshi kanye nenyama futhi kususwe nezithiyo ezikhona njengamanje ezibavimbelayo ukuthi bafinyelele ezimakethe.

### UKUTHOLAKALA KWAMANZI

Uhulumeni wesifundazwe, ngokusebenzisana noMnyango Wezamanzi Nokuthuthwa Kwendle kanye ne-Rand Water sebenqume ukubambisana ukuze kuhlinzekwe imiphakathi yaseMpumalanga ngamanzi. Kutshalwe imali eyizigidi zamarandi ezingama-298 eSigabeni Sokuqala sokuphakela izindawo zasemakhaya ezingama-24, futhi lokhu sekuhlomulise amakhaya ayizi-15 000.

Isigaba Sesibili esizodla imali eyizigidi zamarandi ezingama-601, sesiqalile ukwakhiwa futhi sizophakela amanzi ezindaweni zasemakhaya ezingama-69, futhi lokhu kuzohlomulisa amakhaya ayizi-23 340.

Kuzombiwa amapitsi kuzo zonke izindawo ezingenawo amanzi ukuze kuqinisekiswa ukuthi abantu bayawathola ngaso sonke isikhathi uma bewadinga amanzi.

Ezindaweni lapho ekhona amapitsi kodwa engasebenzi, uhulumeni waseMpumalanga uzowavuselela futhi awalungise wonke la mapitsi kulezi zinyanga ezintathu kuya kwezine ezizayo ukuze kuqinisekiswa ukuthi abantu bayawathola amanzi.